

INFURLANÂ TRIEST

I seguaz di Mussulin a volevin che il Friûl al fos sinpri la «sintinele dal cunfin de Romanitât»; chêi di là a voessin, s'al ocôr, fânus diventà cosacs. Ju vin provâz tant chêi che chêi! E in chestis fassendis il Friûl al jentre tanche un crot tune sope di tripis, cu la risultanze che lis tripis s'es lechin cheatris e il crot al reste a businâ sul stomi dal biât furlan, sintinele de Romanitât!

I nestrîs vons e àn fat par diviars secui senza Vignesie; e dopo che son colâz tes sôs mans par salvâsi dai todescs, la Serenissime ur à supât il sanc cu lis tassis, ur à distrut i boscs pal so arsenâl, e à condanade la puare int a fabricâ montagnis cu la pale - a Palme e a Maran - pe sô difese; e cuanche a vignivin i Turcs, ur diseve: Rangjaisi!

O vin fat senza di Triest fint al '18: cumò si vares di diventâ l'interland di Triest par projodi la capitâl di lat, di formadi, di spongje, di massariis distinadis `e prostituzion; e rizevi in ganbio tubercolosi, sifilide e insolenzis. A Triest, fintremai cent agns indaûr, si fevelave ancjemò furlan; dopo, chêi là nus àn rineâz, si son civilizâz e si son miscligâz cun duc' i rifudûms che s'ingorghin tun puart di mar; e cumò nus ridin in ghigne e nus tegnin par cojars, bogns juste di rifurnî il lôr svilumatissin marcjât neri. Ma s'al ves di tocjânus di restâ cun lôr, ricuardinsi, furlans, che noâtris, o sin cuasi un milion e lôr a son apene dusinte e cinquante mîl. Ur tocje a lôr, vivadiu di tornâ a infurlanâsi un fregul e di ganbiâ sunade viars di nô; e no a noâtris di bastardâsi e di fâ i potis pal lôr intares. Ancje se a Monfalcon o a Zarvignan e - magari cussì no - a Gurisse cualchidun al à zà començât a simiotâju.

Basoâi and'è in dut il mont e ancje in mieç a nô, ma duc' no sin cussì.

(Patrie dal Friûl, 3 - 3 - 1946)